

DIDZA' GUSÖL-LĒ'Ē PABLO YÖDZÖ FILIPOS

Pablo rugapë' Dios bönachi queë' Cristo nacué' Filipos

1 ¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. ² Rinábida'-në' Xúziru' Dios, enca' Xanru' Jesucristo gunnë' queéli' le ruzá' ládxë'ë queéru', en gunë' ga soa dxi icja ládxi'do'oli'.

Pablo rinábinë' Dios bi gunë' quégaca bönachi ta'yéajlë' Cristo

³ Rea'-në' Dios: "Xclenu'", cate' rizá' ládxa'a queéli'. ⁴ Cate' rulidza'-në' Dios, en rinábida'-në' gácalenë' libí'ili', rudzeja ládxa'a ⁵ tu' røjneda' ca bënlenli' neda' tsözxón dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxintë na'a dza. ⁶ Dios gusí lahuë' runë' tu le naca dxi'a lu icja ládxi'do'oli'. Ruzxöni ládxa'a Lë' gúntica'së' caní ga idxintë dza huödë' Jesucristo. ⁷ Ca na' rizá' ládxa'a queéli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxón len neda' le ruzá' ládxë'ë Dios queéru', tsanni ni yu'a lidxi guíë, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queéli' tsaz. ⁸ Nózinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u. ⁹ Rinábida'-në' Dios gunë' ga idxí'iröli' luzá'ali', en gáta'da' queéli' yöl-la' rácada', en yöl-la' réajni'i idú ¹⁰ para gaca cöli' le nácatërö dxi'a. Channö gaca caní queéli', gácali' idú dxi'a, ate' cuntú nu gaca bi innë queéli' dza ni' huödë' Cristo. ¹¹ Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', ré'ënda' inózili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. ¹³ Caní guca, yúgu'të ni'a ná'agaquië' bönni' yúlalui', en ia'zica'rë' bönni' ni nózguequinë' yu'a lidxi guíë ni tu' runa' xichinë' Cristo. ¹⁴ Tu' yu'a neda' lidxi guíë ni ben ga látu'biqui' yúgu'të bóchi'ru' nácagacarë' rugu ladxi', ate' tu'zxöni ládxi'gaquië' Xanru', en bíti'rö tádxinë' tunë' libán que xtídzë'ë Dios.

¹⁵ Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'. ¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquië', en calëga idú ládxi'gaquië'. Té'ënnë' ulu'saca' zi'ë neda'

tsanni ni yu'a lidxi guíë. ¹⁷ Yugu' bönni' idú ládxi'gaquië' na', lu yöl-la' nadxí'i quégaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. ¹⁸ Biti' run lë na' ga rë'a böniga. Rudzéjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní.

Na'a, rudzéjaröda' ¹⁹ tu' chinózida' ulá' lu le raca quia', yu'a lidxi guíë ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risól-lë'ë Jesucristo queëru'. ²⁰ Caní ré'ënda', en ruzxöni ládxa'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxí', ate' lu na'a neda' gácatíca'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹ Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. ²² Channö huáca guna' dxin le gácalen didza' dxi'a queë' Cristo channö sóasa' ibana', bití' nözda' bízxilö ral-la' cóa'. ²³ Naca böniga cóa'. Ré'ënda' gátitea' para tsöjsóalentea'-në' Cristo, tu' gácatërö dxi'a quia', ²⁴ pero runrö bayudxi sóasa' ibana' para séqui'da' gácalena' libí'ili'. ²⁵ Tu' chinózida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzéjaröli' tu' réajlë'ëli' Lë'. ²⁶ Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

²⁷ Guli'güi'sö ladxí' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxón dxin que le réajlë'ëru' le za' queëru' ni'a que didza' dxi'a. ²⁸ Biti' güi'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni uluí'i légaquië' ila'nítië', pero uláli' libí'ili', le gaca bë' rácalenë' Dios caz libí'ili'. ²⁹ Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí'i rizáca'li' cate' runli' xichinë'. ³⁰ Na'a, gaca gunli' neda' tsözxón güi'i ládxi'ru' gunru' libán que didza' dxi'a. Bilé'e quézili' ca gudí'i guzxáca'a cate' bena' caní zí'alö, ate' riyónili' ca riguí'i rizáca'a ca' na'a.

Gúquië' Cristo nöxaj ladxí', ate' bidéli'në' yöl-la' zxön

2 ¹ Cristo runë' ga rutipa ládxi'li',
 en lu yöl-la' nadxí'i queë' ruhuéchi' ládxi'ë libí'ili',
 en runë' ga nácali' tuz len Dios Bö' Lá'ayi,
 en ga nadxí'ili' luzá'ali',
 en ga ruhuéchi' ládxi'li' luzá'ali' tuli' ia'tuli'.

² Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lébisö ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'. ³ Ca naca le runli', bití' bi ral-la' gunli' lu yöl-la' rudul-li' queé'li', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli'

libí'ili' ca luzá'ali'. ⁴ Guli'gúí' ladxi' gaca dxi'a ca' que luzá'ali', en calëga queëzili'.

⁵ Ral-la' gácali' nōxaj ladxi' ca na' gúquië' Jesucristo nōxaj ladxi'. ⁶ Lë' naca cazë' lébisō ca náquië' Dios caz, pero biti' gúquinë' ral-la' gunë' bayudxi ugá'anë' lébisō ca na' náquië' Dios. ⁷ Bucá'ana cazë' yúgu'të le napë', en ben cuinë' ca tu bōnni' nadó'o. Guljë' ca talaj bōnachi, en gúquië' idú bōnachi. ⁸ Cate' ni' náquië' bōnni', gúquië' nōxaj ladxi', en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bōnni' nabáguë'ë dul-la'. ⁹ Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatërō lo ca yúgu'të lágaca bōnachi. ¹⁰ Caní benë' Dios para cate' ila'yōni ca na' lë' Jesús, ulu'zechu zxíbigaca yúgu'të nupa nacué' yehua' yubá, en lu yōdzōlió, en lu lataj chul-la. ¹¹ Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

Ral-la' gácaru' ca tu le ta'gú'u bení' yōdzōlió ni

¹² Que lë ni na', böchi' luzá'ado', ca na' benli' ca rnna xtídzä'a cate' ni' zóalena' libí'ili', runrō bayudxi gunli' ca rnna xtídzä'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queëli' Lë', en lu yöl-la' rizxizi.

¹³ Lë cazë' Dios runë' dxin lu icja lādxi'do'oli'. Runë' ga ré'ënili' gunli' le raza lādxë'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en biti' bi innëli' que, en biti' til-la dídza'li'. ¹⁵ Caní ral-la' gunli', para cabí gaca nu bi innë queëli', pero caní gácali' ca zxí'ini cazë' Dios, nácali' idú dxi'a yōdzōlió ga ni zóali' ladaj bōnachi biti' nácagaca tsahui', en nucá'anagaca Dios. Libí'ili' rigú'uli' bení' lādajagaquië' ca na' ta'gú'u bení' bölj lúzxiba cate' ni naca chul-la, ¹⁶ cate' ruí'ili' lógaquië' didza' ibániguequinë'. Channō caní gunli', huáca udzējade'eda' ni'a que le naca cázali' dza huödë' Cristo, tu' inözda' biti' guca nítisō guzōa bōnadxi gátia', en calëga nítisō bena' dxin. ¹⁷ Yöl-la' réajlë' queëli' Cristo naca tu le raza lādxë'ë Dios. Sal-la' gun bayudxi gátia' para gaca idú yöl-la' réajlë' queëli' Lë', udzējada', en uzí'lēna' xibé tsōzxōn yúgu'tëli'. ¹⁸ Lësca' caní ral-la' udzējali' libí'ili', en uzí'lenli' tsōzxōn neda' xibé.

Ca tunbi' bi'i Timoteo, en bi'i Epafrodito

¹⁹ Channō caní ré'ënë' Xanru' Jesús, runa' löza isól-la'tea'-bi' bi'i Timoteo ga zóali', ate' ní'irō udzējada' cate' huódabi' ududíxjöi'ibi' neda' cātëze raca queëli'. ²⁰ Túzibi' lëbi' rizá' lādxi'bi' ca na' rizá' lādxa'a neda', en ruí'ida' lādxi'bi' libí'ili'. ²¹ Yúgu'të bōnni' ia'zícä'rō, le naca quégacasë' tuí'li lādxi'gaquië'. Biti' tuí'li lādxi'gaquië' xichinë' Cristo. ²² Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsōzxōn dxin que didza' dxi'a, ate' nácabi' quia' ca tubi'

bi'i bönni' rúnlenbi'-në' tsözxón xúzibi' dxin. ²³ Isól-la'a-bi' bi'i Timoteo ga zóali' cate' inözda' nacxi gaca quia' ni ²⁴ sal-la' ruzxöni ládxa'a-në' Xanru' gunë' ga uduyútea' libí'ili'.

²⁵ Lësca' réquida' run bayudxi isól-la'a-bi' bí'i bóchi'ru' Epafrodito ga zóali'. Bi'i ni bénlenbi' neda' tsözxón dxin queë' Cristo, ate' gudíl-lalantu' tu' xihui'. Libí'i cázali' gusól-la'li'-bi' ga zoa' para gácalenbi' neda'. ²⁶ Lë cázabi' ré'ënibi' uduyúbi' libí'ili', en ruí'ida' ládxi'bi' libí'ili' tu' biyónili' ben bayá' queébi'. ²⁷ Le nácatë güí'ibi', en guqui gátibi', pero buéchi' ládxe'ë-bi' Dios, en calégasö lëbi', pero buéchi' ládxe'ë ca' neda', para cabí isëbirö ládxa'a ca na' risëbi ládxa'a na'a. ²⁸ Que lë ni na', gú'uniröda' isól-la'a-bi' queéli' para gaca udzéjali' leyúbölö cate' ulé'eli'-bi', en bítirö isëbi ládxa'a neda'. ²⁹ Guli'sí' lu ná'ali' lëbi' lu yöl-la' rudzeja queéli', tu' nácabi' bi'i bóchi'ru' réajlë'ëbi' Cristo. Guli'gún bal yúgu'të bönachi nácagaca ca nácabi' lëbi', ³⁰ tu' guzóa bönadxi queébi' gátibi' tu' benbi' xichinë' Cristo, en tu' gúcalenbi' neda' uláz queéli'.

Le naca idú tsahui'

3 ¹ iNa'a, böchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queéli' leyúbölö lë na' buzúaja' queéli' zí'alö, tu' gácalen lë ni libí'ili'. ² Guli'gún chi'i cuinli' lógaca nupa ni' tuá' dö'. Nácagaca ca yugu' bö'cu' sínia', nupa na' tun bayudxi irugu lu xipéla'gaquië' bönni' le naca bë' nazí' lu ná'gaquië' xtídzë'ë Dios. ³ Rë'u nadéli'ru' lë na' naca idútë li, le naca bë' nazí' lu ná'aru' le runnë' queéru' Dios. Tu' réajlë'ëru' Dios, zóalenë' Dios Bö' Lá'ayi rë'u, ate' rudzéjaru' tu' nácaru' tuz len Jesucristo. Biti' ca' ruzxöni ládxi'ru' tu le runru' rácasö queéru'. ⁴ La'tu' ruzxöni ládxi'ru' lë ni, lësca' neda' chinadéli'da' bi' uzxöni ládxa'a. Channö zoë' nu bönni' réquinë' ulé' tu' nacuá' le nunë', neda' nadéli'röda' ca bönni' na':

⁵ Gurugu lu xipéla'a lë na' naca bë' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' xzí'ini xi'sóë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

⁶ Bë'da' ládxa'a xibá na' ga bidxintë gudxía ládxa'a bönachi queë' Cristo.

Tsca gaca gáquië' tsahui' tu bönni' tu' runë' ca rinná bë' xibá na', cuntu nu bi guca innë quia'.

⁷ Na'a, yúgu'të lë na' bena' zxön zí'alö, nuzóa' tsölá'alö tu' néquida' queë' Cristo. ⁸ Calégasö yugu' lë na', pero nuzóa' ca' tsölá'alö yúgu'të le dë, para gaca gúnbe'eda'-në' Xanru' Jesucristo, le nácatërö lesaca' ca yúgu'të lë na'. Para gúnbe'eda' Lë' gurú'una' ní'ilö yúgu'të, en réquida' naca ca bëbu, para uzi'a xibé' Cristo, ⁹ en para gaca' tuz len Lë'.

Nuhuóaca' tsahui', calëga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruúnë' tsahui' yúgu'të nupa ta'yéajlë' Lë'. ¹⁰ Ré'ënisida' gúnbë'a-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, ate' guna' Lë' tsözxön, qui'i saca'a ca na' gudí'i guzxáquë'ë Lë', en soa' sina' gátia' ca gútië' Lë', ¹¹ tu' runa' löza Dios, usubanë' ca' neda' lu yöl-la' guti.

Le runru' para idxinru' xilátjaru'

¹² Biti' rnní'a' chinadéli'da' yúgu'të lë ni gunnë' quia', en bití' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'. ¹³ Böchi' luzá'ado', bití' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. ¹⁴ Runa' ca runë' tu bönni' rixítí'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

¹⁵ Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'. ¹⁶ Na'a, ca naca lë na' bidéli'ru', ral-la' gúntica'siru' caní.

¹⁷ Böchi' luzá'ado', guli'gún ca na' runa' neda'. Chibuluí'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. ¹⁸ Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxí quia', rnní'a': Le tunë' zían bönni' run ga nácagaquië' ca nupa bití' ta'lé'e Cristo dxi'a, tu' tu'zöë' tsölá'alö le ben cazë' Lë' lë'e yaga cruz. ¹⁹ Yugu' bönni' tunë' caní, tsöjáquië' lu guí' gabila, tu' naca le ta'zësö ládxi'gaquië' dios quégaquië', ate' tun ba zxön cuíngaquië' ni'a que lë na' ral-la' gun ga ulu'tuí'inë'. Tuí'i ládxi'së le dë yödzölió ni, ²⁰ pero rë'u ni ruí'i ládxi'ru' le dë yehua' yubá ga nabábaru', en ribózaru' dza huödë' Xanru' Jesucristo, Nu rusölá rë'u, urúajë' yehua' yubá na'. ²¹ Lë' utsé'ë idútë le naca cázaru', le riniti caz, en gunë' ga huóaca ca naca idútë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

Ral-la' udzéalentica'siru'-në' Xanru'

4 ¹ Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxí'ide'eda' libí'ili', en ré'ënda' uduyúa' libí'ili'. Runli' ga rudzëjada', en nácali' ca tu le ruzi'a xibé.

² Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiguequi queë' Xanru'. ³ Na'a, bócha'a idú, ré'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzáguië' Clemente, en ia'zíca'rë' luzá'a na' netu'.

Chinazúajgaca lágaquië' yehua' yubá ga na' nazúajgaca lágaca nupa chinadéli'gaca yöl-la' na'bán idú.

⁴ iBuli'dzéjalentica'sö-në' Xanru'!

Leyúbölö, rnníá': iBuli'dzeja!

⁵ iGuli'gaca dxi'i ladxi' len yúgu'të bönachi!

iChizóa huödë' Xanru'!

⁶ Biti' ubi uguí'ili', pero guli'nabi-në' Dios le riquínili', en guli'guíë': "Xclenu'" ca naca yúgu'të lë na' rinábali'. ⁷ Dios gunë' ga gaca queéli' le cuéqui dxi icja ládxi'do'oli', lë na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá' ládxi'li' tu' nácali' tuz len Jesucristo.

Ral-la' sa' ládxi'ru' le nácagaca dxi'a

⁸ Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idútë li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

⁹ Guli'gún ca na' busédida' libí'ili', lë na' guzxí' lu ná'ali' tsca na' bé'lena' libí'ili' didza', en tsca na' bena' ga ni' zóali'. Dios, Nu runna queéru' le ribequi dxi icja ládxi'do'oru' sóalenë' libí'ili'.

Le tsahui' gulunë' yugu' bönni' Filipos queë' Pablo

¹⁰ Rudzéjalenda'-në' Xanru' tu' ruí'i ládxi'li' neda' leyúbölö. Biti' rnníá' gul-la ládxi'li' neda', pero biti' guta' queéli' lataj gácalenli' neda' zí'alö. ¹¹ Lësca' caní, biti' rnníá' caní tu' zoa bi riyadzaj quia', tu' nazëda' tsaza ládxa'a le dësö quia'. ¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'. ¹³ Yúgu'të huazéqui'da' tu' rutipë' Cristo ládxa'a. ¹⁴ Benli' dxi'a cate' ni' gúcalenli' neda', en butí'pali' ládxa'a cate' gudí'i guzxáca'a.

¹⁵ Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacuá' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusól-la'li' quia' bi bunódzjali', tu' guzxí' lu ná'ali' libán bena' neda'. ¹⁶ Tsanni ni' guzóa' yödzö Tesalónica, tu chopá luzuí gusól-la'li' quia' le bunódzjali' cate' ni' biyadzaj quia'. ¹⁷ Biti' ruí'i ládxa'a bi si'a, pero ré'ënda' gáta'rö queéli' le uzí'ili' xibé yehua' yubá. ¹⁸ Rea' libí'ili': Chiguzxi'a yúgu'të lë na' gusól-la'li' quia', ate' gudóditë bë' tsca le biyádzjada'. Ben ga naca caní lë na' gusól-la'li' lu ná'abi' bi'i Epafrodito. Lë na' bunódzjali' naca ca tu le rilá' zxixi le ridxintë lahuë' Dios, en ca tu le rigú'uru' lahuë' Dios le raza ládxi'ë. ¹⁹ Dios gunnë' queéli' yúgu'të le riyadzaj queéli', tsca naca yöl-la' tsahui' röö yehua' yubá, tu' nácali'

tuz len Jesucristo. ²⁰ ¡Gácatíca'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu'gapa Dios luzé'eguequi

²¹ Uláz quia' neda', guli'gapa Dios nupa ni' néquiguequi queë' Dios tu' nácagaca tuz len Jesucristo. Tu'gapë' Dios libí'ili' böchi' luzá'aru' núngaquië' neda' tsözxón ni. ²² Lësca' yúgu'të nupa ni' néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacué' lidxë' bönni' rinná bë'ë idú luyú Roma tu'gapë' Dios libí'ili'.

²³ Rinábida'-në' Xanru' Jesucristo uzá' ládxë'ë queéli' yúgu'tëli'. ¡Ca' gaca!